

Afe mgbi iPol mbi ama onoyeye Emi iRoma

IPol lo afe ke mbi emi iRoma

¹ Afe ne kye mbi iPol, ongbido mgbi iKrestu iYesu, ongwu a kwun ela non gbikye iYesu, ngwu a di dulun dzeke ikye ogbo Eso Osuse mgbi Imgbasho nani.

² Eso Osuse ne Imgbasho ple zonu nye mbi ama ogbese mi Afe Osaan.

³ Eso Osuse ne li odze mgbi Ongwan, mi odzedze mgbi inggise owamye ya, o li ongwiba mgbi iDevedi.

⁴ A kyon tso gbese o li ongwese Imgbasho mi onon ngwi a kyilon mi ikwu mi mfyemgbi Onodzi Osaan nani: O li iYesu iKrestu Otse mgbi eyi.

⁵ Li mi ikpewon beyi ikye iyi mgban ngwi eyi yee ama ogbikye iYesu ngwi mtse di do eyi otso Udze duu ofe gbese nu ma siikye nu di dze yi oyeye onuunu aani.

⁶ Ema kpaa wodze idzidze ama ngwu a kwu ma ela gbese nu ma yee emidi iYesu iKrestu neni.

⁷ Ani le lo afe ne ke mbi ema emi iRoma, nkpa Imgbasho itukwu ngwu O di kwu ema ela gbese, ni ema li emi osaan nani: Elela yi iyu nkye mbi Imgbasho Otseyi yi Otse iYesu iKrestu na no dze yi ema duu.

I mina iPol oke iRoma

⁸ Ababɔ yɔ, angba mgbi ani le kɛ mbi Imgbasho mgben ikpewo iYesu iKrestu ikye ema duu, ikyena a gbɔdzɛ oyeyɛ onuunu mgbi ema kpatɛ ɛsɛ duu.

⁹ Imgbasho, Ongwu ani li kyɔn idɔ itukwu onyi mi ogbeeso osuse mgbi ongwani na li obwendɛ mgben dafi n li wɛ ema alono

¹⁰ mi ibɔ mgben obɔɔɔɔ mani. N di bɔ gbɛɛ kpakpana Imgbasho ka nu ani ofɛ nin ba mbi ema.

¹¹ I mina ani odi ema adzi nin kye umba mgbi onodzi nu ema onu ema fyumfye mi oyeyɛ mgbi ema onuunu,

¹² ikyegbɛɛ, ni eyi fyi eka mfye itukwu mi oyeyɛ onuunu mgbi ewe.

¹³ I mina ani gbɛɛ ema ki ye emi ongwunani, dafi onɔ ibyiɔni ani weka okɛ mbi ema mani, kpaa ofɛ nin ba nghataa ba onɛnɛni. I mimen gbɛɛ nin ka tu ama okyatitukwu mi idzidzɛ ema, yeyɛ dafi ani tu mi idzidzɛ udzɛ angbeka kpaa nani.

¹⁴ N dzɛ yi idɔ okyɔ yi emi iGriki bɛyi emi iGriki ba kpaa, ikye ama okwiinɛ bɛyi ogbadro duu.

¹⁵ Li ngha ngwi i tɛɛ ani olo kpakpa ogbo Eso Osuse nya ema ama nto iRoma aali.

¹⁶ Bana ayiwi kwu ani ogbo Eso Osuse nɛ ba, ikyekyɛ li mfye mgbi Imgbasho ikye owato-wato mgbi ali inggise nnoyeyɛ duu: ababɔ ikye emi ijuda duuse Udzengye.

¹⁷ Lubana Eso Osuse nɛ Imgbasho kye tso ofɛ ngwi inggise ka dzɛ nyaan yi Ongwu mani: ngwi li mi oyeyɛ onuunu mi owita-wita nghataa ka dondu. Yeyɛ dafi Afɛ lo mani gbɛɛ: <<Ama osaan ka dzɛ oshishe mi oyeyɛ onuunu.>>

*Itingga mgbi Imgbasho ikye
inggise owamyē*

¹⁸ Itingga mgbi Imgbasho ne tsoto mi esho ikye ama ngbela yan ba duu yi emi imbaali ama nli si otsitsi beše yi imbaali mgbi ama mani.

¹⁹ Lubana ungwō ndze gyo ngwi a ka ye Imgbasho daada ba, ikyekye Imgbasho kye tso ma gedee.

²⁰ Inggise sulu itōdze ogbē n ki ye wuba, lubana wita mi onō ese ota-ta majo, odzēdze mgbi Imgbasho ngwi a li din ba, mfyē mgbān ogyegwu, mbisō onghaangha mgbān duu, O nu ma di saan adzi ni inggise ka yagba tangwan ba du.

²¹ Lubana ngwi a ye Imgbasho ne kpaa, a li nun mmwe gyo yan hona tan angba ba, kpaa ewe otseetse mgbi ama yee ayayi, ikwangha itukwu mgbi ama yifu.

²² Ama yo tsewe gbē ama kwiine, nghaduu a yee emi ikwangha

²³ ngwi a kile sunu Imgbasho nli kwulu ba na ma, a ye le sunu adagyē ngwi a kpaakpa dze dafi inggise naadi ingwunō naadi mmbwaba hona ungwō ama okwo ifu ese (nli kwulu ntonani).

²⁴ Nghane Imgbasho dzata ma nu ma kyo alungwō ayiwi ngwi itukwu mgbi ama mina mani. Ewodze idza mgbi ama nu ma kyungwō ayiwi ola yi ewoma di nu ikpewo mgbi ama mmwe wuba.

²⁵ A kyi nyine otsitsi mgbi Imgbasho yi atsika, ye le sunu ungwō ama Imgbasho taata ngha Imgbasho ntaata ungwō, nme ngwi a ka tsan gyegwu nani. No dze ngha.

26 Mi itɔdzɛ nɛ Imgbasho dzata ma nu ma le mina ungwɔ ayiwi. Engyaa mgbi ama kpaa le la yi engyulo dafi atta ta ma wuba, yɛ le la yi ewoma.

27 Mi itɔ ofɛ nɛ kpɔɔ engyulo kpaa dzata abɔ ola yi engyaa yɛ le la yi ewoma. Engyulo le kyungwɔ ayiwi yi ewoma, di tu umba mgbi adɔ okwookwo ngwi gyo yi ikwangha ali mgbi ama nani.

28 Okiyayi yo, ngwi a fwa ogbela Imgbasho nɛ, O dzata ma ni ewodze ikwangha mgbi ama kye ma teyi. Li ikyengha ngwi a le kyo idza nwogyɔ a ki le kyo ba aali.

29 Imbali gbɛ ma sɔ, ungwɔ ibwubwe yi nggwɔ yi mmgbɛ. Anyi mbwo ma itukwu yi inggise ongwɔngwɔ yi ibe ogboogbo yi okpagyewo beyi inggise okye wo itukwu. A li ama odziidze,

30 ama ogbaagya yi ama Imgbasho ta ma anyi, ama ofyito yi emi imoga beyi abɔ otsigegɛ; a li ba yi ofɛ ofufe okyungwɔ obube; di li ngha ama omba ma adɔ;

31 a dze yi ozoyeye ba, oyeyɛ onuunu ba, a tishi itukwu ba, a li di elela ba.

32 Ngwi a ye dafi ola mgbi Imgbasho gbɛɛ, inggise nkɔ itɔ ali ntonɛ gyo ondu ikwongye nɛ kpaa, a kɛɛkiyayi okyungwɔ ntonɛnɛ ta ba kpaa, a li tu ama nle kyo itɔ ali nɛ wo nu ma kiyayi.

2

Ikwo mgbi Imgbasho oyeyɛ mani

1 Nghanɛ, ema ama nli fwo inggise angbeka ikwo nɛ, dze yi ɛkyɛ oto-to wuba, lubana mi ali itɔ ofɛ ngwi ema le fwo angbeka ikwo duu, ema

le ngyelu yi ewema, ikyekye ungwɔ ngwi ema le fwo angbeka ikwɔ mi ele nɛ, ema le kyo ma tsatsa.

² Ikyenghane eyi ye ta gbɛɛ ikwɔ ofwoofwo mgbi Imgbasho mbi ama nle kyo ito ungwɔ ntonɛ li mi otsitsi.

³ Nghawane ni abu inggise ɛwɛwɛ le fwo ma ikwɔ dile kyo ungwonyi yi ama ma, o tsewɛ gbɛɛ o ka watɔ mi ikwɔ ofwoofwo mgbi Imgbashoo?

⁴ Naadi ema kwu itukwu oleewo mgbi Imgbasho okwulewo yi onyɔtse beyi itukwu mgban oshiishi nɛ shanye? Mi otsitsi yo ema ye dafi Imgbasho di eyi elela mani, ikyesine o le tobyi eyi ni eyi kyata mi ali ibwubwe mgbi eyi.

⁵ Kpaa mi ikye adɔ onghaangha beyi itukwu otiishu mgbi ema yo, ema le gbe adɔ okwookwo ngwikwo le fɛ egbe itingga mgbi Imgbasho, onɔ ngwi ikwɔ mgban ofwoofwo mgbi otsitsi na kawa tsoto mani.

⁶ Imgbasho <<Ka wa nu ali inggise yeye dafi otsungwon kyo mani.>>

⁷ Ama nkwunewo kyo osuse kyedɔ okwɔkwɔ, yi mmwɛ beyi oshishe nka dondu ba na, o ka nu ma oshishe ogyegwu.

⁸ Nghaduu ama nli tsuntsli di fwa otsitsi dile kyedɔ ofɛ ibwubwe yo, itingga yi itukwu owuluwulu ka dze ikye ma.

⁹ Okakewo yi iso okwulewo ka dze ikye ali inggise owamyɛ nkyungwɔ ibwubwe yo: ababɔ mbi emi iJuda, man mbi ama nli emi iJuda ba;

¹⁰ nghaduu Imgbasho ka kye okwɔkwɔ, mmwɛ yi iyu nu ali inggise nkyɔ osuse duu: ababɔ mbi emi iJuda, beyi mbi ama nli emi iJuda ba.

¹¹ Lubana Imgbasho li tso osadu-sadu ba.

¹² Ama nkyɔ obube ngwi ola dze waba ma kpaa, a ka ngwɔ ma ikwɔ imbisɔ ngwi a dze yi ola ba mani, ama nkyɔ obube ngwi ola dze yɔ, a dika ngwɔ ma ikwɔ mi ola mani.

¹³ Lubana li ama nfwoofwo ola mata le saan mi ine Imgbasho ba, kpaa li ama nngyo ola ma ngwi a ka kwu ma di ama osaan aali.

¹⁴ (Udzengye dze yi ola ba, kpaa nu ma le kyo dafi ola mina ma yɔ, i yɛɛ ola mboma, dafi a dze yi ola ba ne kpaa.

¹⁵ A tso ambɛ gbɛɛ ungwɔ ngwi ola mina ma, a lo ma mi itukwu mgbi ama, dafi ewodze mgbi ama kpaa dile kyo obwendɛ mani. Ewe otsetse mgbi ama kpaa le nu ma obube hona nagbe ma.)

¹⁶ Ungwɔne ka wa kyo mi egbe ngwi Imgbasho ka nu iYesu iKrestu gbɔ inggise ikwɔ mi ungwɔ ama a le kyo daada, dafi Eɔ Osuse mgbɛn gbɔ mani.

Emi iJuda beyi ola

¹⁷ Ikyenghanɛ, ni abu kwu ewabu di emi iJuda; di kye abɔ byikɛ ola, di kye odzɛɛdze mgbi abu yi Imgbasho le kwaayi;

¹⁸ di ye owitukwu mgbɛn yɛ gbela yi ungwɔ nnghaangha ikyekye ola tso abu;

¹⁹ di gbela otsitsi gbɛɛ abu li inggise otso obine ofɛ, di li osa mgbi ama nwoto iyifu,

²⁰ abu li inggise owe emi ikwangha odze, abu li otsetse mgbi engbɛ ama oshilele, ikyekye abu ye odzɛɛdze mgbi ola beyi otsitsi mgbɛn,

²¹ nghama abu, o li tso angbeka, kyɔne ngwi o tso ewoo wuba? Abu nle gbeeso gbɛɛ ni inggise ka yimi ba ne, o kale yimii?

²² Abu nli gbɛɛ ni inggise ka kɔ amah ba nɛ, o li kɔ amaah? Abu ngwu angwula ta abu anyi nɛ, o li yimi mi ozu angwulaa?

²³ Abu nli kyile ewo esho yi ola nɛ, o li kwu Imgbasho shanyɛ mi ola ofaafaa?

²⁴ Dafi a lo mi afe gbɛɛ: <<A fya iyi Imgbasho ito mi Anengye ikye abu.>>

²⁵ Kini abu ngyo ola yɔ, ikye sulu oyabo, kpaa ni abu foola yɔ, abu yɛɛ dafi o kyiikeye ye kpaa ba.

²⁶ Ki ama nkyiikeye ba le kyungwo ama ola mina ma, Imgbasho ka di ma dafi ama nkyiikeye ntona baa?

²⁷ Mi otsitsi yɔ, Ama nli emi iJuda ba ngwu a kyan ikye ba kpaa ngyo ola yɔ, ka yagba nu abu ngwu dɛ yi ola di kyiikeye kpaa foola ma gye obube.

²⁸ Inggise nkyiikeye mi mmbwe yi eyi taman ka yɛɛ emi iJuda otsitsi ba.

²⁹ Ei, inggise emi iJuda otsitsi yɔ, li inggise ngwu itukwu mgban le saan yi Imgbasho mani. Ikye okyɛkye otsitsi nɛ, di li osunu ola ngwi a lo mi afe ta ba; kpaa li itukwu okyata-kyata nkye mi Onodzi mgbi Imgbasho nani. Inggise nkyatitukwu na li mina gbɛɛ, ni inggise tɛ ongwu ba, kpaa ni Imgbasho tɛ ongwu.

3

Imgbasho li nyine ba

¹ Ni inggise li emi iJuda, o ngha angbeka mi ekye? Naadi oyabo mgbi ikye okyɛ-kye li ekye?

² Dɛ yi oyabo mi ali itɔ ofɛ duu! Ababo yɔ, li ama Imgbasho kye elodɛ mgban wo ma abɔ.

³ Ni emi iJuda angbeka dze yi oyeye onuunu ba ma? Oyeye mgbi ama onuunu ba na ka yagba nde Imgbasho ombwo ondu odzeedze mgbaan?

⁴ Onoka ba du! Ki ali inggise duu li gbatsika kpaa, Imgbasho li gbo otsitsi. Dafi Afe lo mani gbɛɛ:

<<Ikye ni Abu gbɔdze yɔ,
ni a di gbɛɛ Abu gbo ayin,
ni Abu di gbiikwo yɔ,
ni Abu di ngha.>>

⁵ Nghaduu kini okpekpe mgbi eyi nu osaan mgbi Imgbasho nghao tsoto saan ma, eyi ka gbɔsine? Eyi ka gbɛɛ Imgbasho kyɔ ayin ba oky-itingga yi eyii? (N byita odze ma dafi ikwangha inggise mani.)

⁶ Li ngha ba du! Ki Imgbasho li gbiikwo mi otsitsi ba ma, O gbo ɛse ikwo sine?

⁷ Inggise oka ka tangwe gbɛɛ, <<Kini atsika ngben ogboogbo nu otsitsi mgbi Imgbasho beyi okwɔkwo mgban sheeshe waali, kyɔne ngwi Imgbasho dika kwo ani adɔ?>>

⁸ Inggise angbeka kye ondu le wo eyi ewo mi atsika di eyi gbɛɛ, <<Tatase okyɔ obube kpakpa!>> Ama nle gbo itɔ odze ntonene me ngwi Imgbasho ka ngwo ma ikwo.

Inggise onyi kpa le saan ba

⁹ Nghanema eyi duu ka ngyelu sine? Eyi emi iJuda tatase ngha ama nli emi iJuda ba ntonaa? Ba dududu! Eyi teyi kyi gbɔlu ngye wa, gbɛɛ, emi iJuda yi ama nli emi iJuda ba kpaa li ofyee mgbi alobube ungwonyi.

¹⁰ Dafi a lo mi Afe mani gbɛɛ:

<<Inggise onyi osaan dzema ba,
ei onyi kpaa ba;

11 inggise onyi odze yi ozoyeye kpaa dzema ba,
inggise onyi kpaa pita oye Imgbasho ba.

12 Ama duu kyata iyikpa,
a yee ayayi duu;
inggise onyi kpaa kyo osuse ba,
onyi kpaa ba.

13 Elodze mgbi ama dze dafi endzi
ngbofo le nukwo mani;
ikyide mgbi ama li gbatsika.
Unka mgbi ogidzi dodze
ikpondu mgbi ama.

14 Ikamba yi elodze ama
onuno mbwo ma ondu.

15 Afo mgbi ama dze vla-vla
o ka dze eyi kyi ese;

16 ido mgbi ama li onu inggise
kaka iso ali imbe ngwi a ke duu,

17 a ye ofe odze mi iyu ba.

18 A dze yi imio mgbi Imgbasho ba du.>>

19 Onene eyi ye gbeye alungwo ngwi ola gbo yo, i
gbo yi ama nwoto abo ola mani, ikye ni ali inggise
ka natsondu yi Imgbasho wuba.

20 Nghanen Imgbasho ka yama gbela yi inggise
gbeye o le saan mi ikye ola ongyoongyo ba, lubana
li ola li nu eyi difwi gbeye eyi kyo obube.

Osaan ikpewo oyeye onuunu

21 Nghaduu dulu ola dzeke ese onene kpaa,
osaan nkye mbi Imgbasho ma a nu eyi yen wa,
ngwi ola beyi ama ogbeese mgbi Imgbasho kyo
obwendu.

22 Osaan nkye mbi Imgbasho ne ba ikpewo oyeye onuunu mbi iYesu iKrestu ikye ama nnoyeye duu. Idzidza dzema ba,

23 lubana inggise duu kyo obube di dzitsi mi okwakwa mgbi Imgbasho,

24 kpaa Imgbasho nu eyi gye emyemye ayayi mi elela mgban mi owato-wato nba ikpewo iKrestu iYesu nani.

25 Imgbasho kyon nu dafi ife ofee, mi onoyeye mi eyi mgban. O kyungwone ikye okye emyemye mgban tso, ife ne tso gbex, Imgbasho kyo osuse dafi o kwo ama nkyo obube mi onɔ ngwi nye na ado ba mani,

26 o kyungwone ikye otso gbex ongwu li inggise ogbiikwa osuse mi onɔ ongwɔ onene neni, ikye ni ongwu gye emyemye di nu ama nnoyeye mbi iYesu gye emyemye.

27 Nghane abo otsigex ko? A kye dzexe enggenga. Mi ali ito ofe? Li mi ola ongyoongyoo? Ei, kpaa li mi oyeye onuunu ngwi eyi ka gye emyemye.

28 Lubana eyi kye abo byi gbex inggise li gye emyemye li mi ola ongyoongyo ba, kpaa li mi oyeye onuunu.

29 Imgbasho ne li Imgbasho mgbi emi iJuda yuomaa? O li Imgbasho mgbi Udzengye kpaa baa? Eɛn, li mgbi Udzengye kpaa,

30 Ngwi Imgbasho li onyi ta ne, li ongwu ka nu ama okyiikye beyi ama okyiikye ba duu emyemye.

31 Nghanema, eyi ka kyi ngwolu ola do ikye oyeye onuunu nee? Onoka ba du! I ka kekuyayi onu ola mmwe.

4

Abrahan gye emyemye mi oyeye onuunu

¹ Ikyenghanɛ li ekye ngwi eyi ka gbɛɛ otsikyeyi Abrahan difwi mi itɔdze nɛ?

² Ni Abrahan gye emyemye ikye idɔ yɔ, o dze yi ungwɔ otsabɔ igɛgɛ ele, kpaa li mbi Imgbasho ba.

³ Afɛ gbɔ dikye? <<Abrahan nu Imgbasho oyeye, Imgbasho kyon gbɛɛ o li inggise osaan.>>

⁴ Kini inggise kyidɔ yɔ, awuya ngwi a li kpan na a li di gbɛɛ li umba ba, kpaa li ungwɔ nwogyɔ a ka kyɔ.

⁵ Nghaduukpaa, inggise ama nli kyidɔ ba kpaa li nu Imgbasho ongwu nli nu emi imbaali kpaa gye emyemye na oyeye yɔ, a li kye oyeye onuunu mgbi ama gbɛɛ di li osaan.

⁶ IDEvedi kpaa gbɔ ngha onɔ ngwi o gbɔdze inggise nkyidɔ ba kpaa Imgbasho non gye emyemye ma gbɛɛ mse dze yan:

⁷ <<Mse dze yi ama ngwu a dзамата yi obube, di tukwulu ma alobube mani.

⁸ Mse dze yi inggise ngwu Otse ka kye alobube mgban wuuta ba mani.>>

⁹ Mse nɛ dze ikye ama okyiikye kyoon ta naa dze ikye ama nkyiikye ba kpaa? Eyi teyi li gbɛɛ oyeye onuunu mgbi Abrahan nu ma kwun di inggise osaan.

¹⁰ Otse-tse na ba mi ali itɔ ofɛ? A tsan duuse non kyiikye naadi o kyiikye se? A tsan duuse o wa kyiikye!

¹¹ O di gbe ambe ikye, ambe mgbi osaan ngwi o tu mi oyeye onuunu mi onɔ ngwi o kyiikye waba

mani. Ikyenghane, o li otsɔ ama nkyiikye waba kpaa noyeye duu, adzi ni a kwu ma di ama osaan.

¹² O di li otsɔ ama nkyekyikyɛ ta ba kpaa le kyikyɛ mi oyeye onuunu ngwi Abrahan tun duuse wa kyiikyɛ nani.

¹³ Li mi abɔ ola ngwi Abrahan yi eto mgban tu ondu odzɛɛdze gbɛɛ, o ka gyokwudɛ ɛsɛ ba, kpaa li mi osaan nkyɛ mi oyeye onuunu nani.

¹⁴ Lubana ni ama nle kyɛɔ ola ntona yɛɛ ama gyokwudɛ yɔ, oyeye onuunu dze yi oyabɔ wuba ondu odzɛɛdze mgban kpaa yɛɛ ayayi.

¹⁵ Ikyekyɛ ola li ba yi itingga. Imbe ngwi ola dze bayɔ ola ofaafa kpaa dze ba.

¹⁶ Nghane, ondu odzɛɛdze li ba mi oyeye onuunu, adzi ni elela di dze ikye eto mgbi Abrahan duu. Ondu odzɛɛdze otsitsi nɛ dze ikye ama nli mgbi ola kyoon ba, kpaa li mbi ama nsulu oyeye onuunu mgbi Abrahan nani. O li otseyi duu.

¹⁷ Dafi Afe tsekise lɔ ma gbɛɛ: <<Ani nu abu li otsɔ ɛsɛ ibyibyi.>> O li otseyi mi ine Imgbasho, ongwu o nun oyeye nani, Imgbasho nli kyile emi ikwukwɔ, di li kwu ungwɔ ama ndzema ba dafi a tsekise dze nani.

¹⁸ Ngwi dze dafi ɛwe ogbe byiibyi dzema ba nɛ kpaa, Abrahan gbewɛbyi noyeye. Nghane o yɛɛ otsɔ ɛsɛ ibyibyi, yeye dafi Imgbasho teyi nyan mani gbɛɛ, <<Li ngha ngwi engwiba mgbi abu ka mbwo aali.>>

¹⁹ Ngwi Abrahan mɛ onova ideli onyi nɛ kpaa, oyeye onuunu mgban shanye ba. O ye dafi ongwu dze kwekwe okwulu, owan iSara kpaa kye ka mbongwe wuba mani.

²⁰ Nghaduu Abraham tangwe ondu odzædzæ mgbi Imgbasho ba, kpaa kæekiyayi mi oyeyæ mgban onuunu di kye okwækwo nu Imgbasho,

²¹ ikyesine o ye saan ta gbæ Imgbasho dze yi mfyæ okyungwo ngwi o zondu nani.

²² Li ikyengha <<ngwi a gbela yan gbæ o le saan aali.>>

²³ Elodze ngwi a lo gbæ <<a gbela yan na>> a lon li ikye mgban yuon ba,

²⁴ kpaa li ikye eyi ama Imgbasho ka gbela gbæ eyi le saan ikye gbæ eyi noyeyæ mbi ongwu Imgbasho nkyile iYesu Otse mgbi eyi mi ikwongye mani.

²⁵ A kyon nu mi abo ikwongye mi ikye ali ibwubwe mgbi eyi di kyilon mi ikwongye ikye ni eyi gye emyemyæ mi inæ Imgbasho.

5

Iyu yi atsa

¹ Nghawanæ, dafi eyi gye emyemyæ mi oyeyæ onuunu næ, eyi sulu iyu yi Imgbasho mgbi eyi ikpewo Otse mgbi eyi iYesu iKrestu,

² ongwu eyi tu ofæ kaka elela ongwu eyi kwudze ele onenæ næ mi oyeyæ onuunu neni. Eyi di dze yi atsa yi ewe ogbe byiibyi otu okwækwo mgbi Imgbasho nani.

³ Li ngha ta ba, kpaa eyi di tsatsa mi iso mgbi eyi, ikyekye eyi ye ta gbæ iso li ba yi itukwu oshiishi;

⁴ itukwu oshiishi li ba yi itukwu ofyumfye, itukwu ofyumfye li ba yi ewe ogbebyi.

⁵ Ewe ogbe byiibyi di li nu eyi ayiwi ba, ikyekye Imgbasho kye okpitukwu mgban yawo eyi kæ

itukwu nye mi Onodzi Osaan ngwi O kye nu eyi nani.

⁶ Ngwi onɔ wa gyo yeye ne, iKrestu kwulu ikye eyi mi onɔ ngwi eyi dze yi mfyɛ ba kale ngha Imgbasho adɔ mani.

⁷ I fyumfyɛ ni inggise kwulu ikye inggise osaan, kpaa mi ikye inggise osuse saan yo, kaba inggise ka yagba kwulu.

⁸ Nghaduu Imgbasho kye okpitukwu mgban tso eyi mi ito ofe neni: Ngwi eyi ka li emi ali ibwubwe majo iKrestu kwulu ikye eyi.

⁹ Ngwi eyi gye emyemye mi eyi mgban wa ne, a ka dula eyi mi itingga mgbi Imgbasho ikpewon sine ngha lo?

¹⁰ Lubana onɔ ngwi eyi ka li engyikyili mgbi Imgbasho ma, a yile eyi gyiide yan mi ikwu onghan, ikyegbeɛ a yile eyi gyiide ne, eyi ka wa wato ikpewo okyeɛ-kyeɛ mgban mi ikwu sine ngha lo?

¹¹ Ungwone li ngha ta ba, kpaa eyi di tsatsa mbi Imgbasho ikpewo Otse mgbi eyi iYesu iKrestu, mi oyile eyi gyiide yi Imgbasho.

*Ikwongye ba ikpewo Adan, Oshishe
kye ikpewo iKrestu*

¹² Nghane, dafi alobube kaka ese ikpewo inggise onyi, ikwongye di kaka ese ikpewo alobube ne, inggise duu tu ikwongye, ikyekye ali inggise duu kyo obube.

¹³ Lubana duuse ni a kye ola nu yo, alobube teyi dze ese neni. Kpaa a kye alobube wuuta ba ikyesine ola dzema waba.

14 Ndze nghane kpaa, ikwongye wita kye onɔ mgbi Adan nghataa ba onɔ mgbi iMose jo kaka mbi ama nfoola dafi Adan ndze dafi iKrestu nka wa ba na ba mani.

15 Nghaduu umba ungwɔ ngwi iYesu kyo na dze dafi adɔ onghaangha na ba. Lubana ki ibyi inggise kwulu ikye adɔ onghaangha mgbi inggise onyi yo, mbi inggise onyi iYesu iKrestu na umba itukwu oleewo mgbi Imgbasho nkye mbon ka gbɔfwe mbi ibyi inggise!

16 Odi kiyayi yo, umba mgbi Imgbasho dze dafi alobube ngwi Adan kyo na ba. Ikwɔ kyedɔ alobube onyi na di ba yi odzili-dzili, kpaa umba na yo kyedɔ adɔ onghaangha mgbi inggise ibyibyi di nu ma gye emyemye.

17 Lubana ki adɔ onghaangha mgbi inggise onyi, nu ikwongye gyuto ikpewo inggise onyi na waali, ka dze sine mbi ama ngbe elela mgbi Imgbasho dzii beyi umba mgbi osaan ngyuto mboma ikpewo inggise onyi iYesu iKrestu na!

18 Nghawane, dafi adɔ onghaangha onyi ba yi odzili-dzili mbi inggise duu ne, li ngha ngwi ali osaan onyi ba yi emyemye nka nu inggise duu tu oshishe yeye aali.

19 Lubana dafi adɔ onghaangha mgbi inggise onyi nu inggise duu yee emi alobube ne, li ngha ngwi osiikyenu mgbi inggise onyi ka nu inggise ibyibyi yee saan kpaa aali.

20 A kye ola na ba ikye ni obube tsoto; kpaa ni obube tsoto yo, elela Imgbasho nghao tsoto duu.

21 Ikyenghane, dafi alobube gbe inggise duu teyi kaka ikwongye ne, li ngha ngwi elela mgbi Imgbasho nnu eyi osaan na gbe eyi teyi onene, nu

eyi tu oshishe gyegwu ikpewo iYesu iKrestu Otsɛ mgbi eyi aali.

6

Eyi kwulu mi alobube, ye dze oshishe mi iKrestu

¹ I ka gbɔn sinɛ wadɛn? Ni eyi kɛɛkiyayi okyɔ alobube zukwu ni elela sheeshee?

² Onoka lo! Ni eyi kwulu mi alobube waali; kyɔsinɛ se eyi di kale kyɔn kpɔɔ?

³ Naadi ema ye dafi eyi ama ngwu a kyɔ eyi iBatisima mbi iYesu iKrestu nɛ, a kyɔ eyi iBatisima kaka ikwongye mgban ma wɛ?

⁴ Nghanɛ a gbe eyi ndzi yan nyɛ mi iBatisima kaka ikwongye ikyegbɛɛ, dafi a kyile iKrestu mi ikwongye mi okwɔkwɔ mgbi Otsɔn nɛ, eyi kpaa kawa dze mi oshishe ofufɛ.

⁵ Dafi a gbe eyi kwokyi yan mi ikwongye nghanɛ, li kyɛmɛ a dika gbe eyi kwokyi yan mi okyɛɛ-kyɛɛ mi ikwu.

⁶ Lubana eyi ye odzɛɛdze mgbi eyi ogbugbe na a kye gbokwo yan ikye ongyɛlu yi ikpewo mgbi alobube nani, zukwu ni eyi ka li ofyɛɛ mgbi alobube wuba.

⁷ Inggisɛ nkwulu yi iKrestu ta wa yɔ, o wato mi alobube.

⁸ Onɛnɛ kini eyi kwulu yi iKrestu yɔ, eyi noyɛyɛ ta gbɛɛ i dika wa dze oshishe yan.

⁹ Lubana eyi ye ta gbɛɛ ngwi a kyile iKrestu mi ikwu nɛ, o ka yama kwulu wuba; ikwongye sulu mfye onghan wuba.

¹⁰ Ikwu ngwi iYesu kwu na, o kwikwu akponyi ikye odzili alobube; kpaa oshishe ngwi o dze na, o dze ikye Imgbasho kyoona.

¹¹ Mi ito ofe na kpoo, kye ewema gbɛɛ ema kwulu ikye odze mi alobube wuba, kpaa we gbɛɛ iKrestu iYesu nu ema oshishe mbi Imgbasho.

¹² Ikyenghane ka nu alobube gyuto mi ikpewo mgbi abu nli kwulu ne ba, di abu wa sunu imina mgbani ibwubwe.

¹³ Ka yama kye alewo mgbi ema nu ali ibwubwe no yee okye mgbi imbaali ba. Kye ewema nu Imgbasho, dafi ama ngwu a dula ma to mi ikwongye luba oshishe mani; di kye alewo mgbi ema nun dafi okyiido mgbi osaan mani.

¹⁴ Nghawane, ka nu alobube kye ema teyi ba, ikyekye ema byidze abo ola ba, kpaa abo elela.

Ofyee mgbi osaan

¹⁵ Ungwo ntonɛ duu ma itan sine? Eyi ka kiyayi okyo obube ikyegbɛɛ eyi woto abo ola ba kpaa woto abo elela nghaoo? Onoka ba du!

¹⁶ Ema ye dafi ema li ofyee mgbi inggise ngwu ema le siikyenun ma we? Ema ka yagba li ofyee mgbi alobube di kwulu, hona ofyee ama osiikyenu Imgbasho, nka nu ema dze mi ofe mgbi osaan.

¹⁷ Nghaduu eyi ta Imgbasho angba gbɛɛ, nose ma ema li ofyee mgbi alobube kpaa onene yo, ema ye kyedo ito otsootso ngwi a tso ema ne itukwu onyi.

¹⁸ A she ema adi mi ifu alobube, ema yee ofyee mgbi osaan.

¹⁹ N le gbɔdze nɛ mi odzɛɛdze mgbi inggise owamye ikyekye ema ndɛ mi odzɛɛdze mgbi atta mgbi ema. Dafi ema li kye alewo mgbi ema yɛɛ ofyɛɛ nu idza ni ali ibwubwe mgbi ema le sheeshe wele ma, onɛnɛ kye alewo mgbi ema yɛɛ ofyɛɛ nu osaan nka kye ema kaka osaan kpaa mani.

²⁰ Onɔ ngwi ema li ofyɛɛ mgbi alobube ma, ungwɔ kwu osaan akye yi ema ba.

²¹ Li ali oyabɔ ngwi ema tu mi onɔ na mi ungwɔ ama n yɛɛ ema ungwɔ ayiwi onɛnɛ nɛ? Bana ungwɔ ntona li ba yi ikwongye mi ongyɛngye!

²² Nghaduu onɛnɛ ngwi a dulu ema tɔ mi abɔ alobube di yɛɛ ofyɛɛ mgbi Imgbasho nɛ, oyabɔ ngwi ema tu ma kye ema kaka osaan. Ongyɛngye mgban di li oshishe ogyegwu.

²³ Lubana mkpa alobube li ikwongye, kpaa umba mgbi Imgbasho li oshishe ogyegwu mbi iKrestu iYesu Otse mgbi eyi.

7

Tɔ mi abɔ ola luba mbi iKrestu

¹ Emi ongwunani, ema ama nbɛ mi ola ntonɛnɛ, ema ye dafi ola li kyidɔ mi ikpewo inggise onɔ ngwi otsungwɔn dze oshishe ma ta baa?

² Dze sini, ola tso gbɛɛ ongyaa dze ikye oban onɔ ngwi o ka dze oshishe mani. Nghaduu ni oban kwulu yɔ, o tɔ mi abɔ ola nani.

³ Nghawanɛ, ki non kyuka yi ongyulɔ oka ngwi oban ka dze oshishe yɔ, o kyo amah. Kpaa ni oban wa kwulu yɔ, o tɔ mi abɔ ola nani. Non ye bongyulɔ oka jokpa, o yama li ongyaa amah wuba.

⁴ Nε, emi ongwunani, ema kpaa ola nwodze mbi ema na kwulu ikpewo ikwu iKrestu, ikye ni ema li mgbi iKrestu ongwu a kyilon mi ikwu ikye ni eyi wa owaawa mbi Imgbasho nani.

⁵ Lubana ngwi odzedze ibwubwe mgbi atta kye eyi teyi ma, imina obube ngwi ola kye ba ma le kyido mbi eyi, man alungwo ngwi eyi kyo duu ngye mi ikwongye.

⁶ Nghaduu onene ngwi eyi kwulu mi ungwu nple kwu eyi ofyee ne, eyi to mi abo ola ikye ni eyi ki kyungwo mi odzedze ofufe mgbi Onodzi, no ka li imbiso mgbi ola ogbugbe ngwi a loolo na ba.

*Ogbili-gbili mgbi alobube yi ola
mi itukwu*

⁷ I ka gbɔn sine wa den? Ola ne li ungwu obubee? Ono oka ba du! Mi otsitsi ki li ola bayo, n kika ye ungwu nli alobube ba du. N kika ye ungwu nli odi mbe angwo ba du, ni ola ki gbɛɛ, <<Ka yama di ungwu mbe angwo bayo.>>

⁸ Li ofe ngwi ola kye ba nani, ngwi alobube tu ofe okwokyile ali imina obube duu mbi ani aani. Kini ola dzema bayo, alobube dze yi mfye wuba.

⁹ Duuse ni ani ye ola yo, ani dze oshishe; kpaa ngwi ola wa ba ne, alobube fwi to dze oshishe man ani kwulu.

¹⁰ N difwi gbɛɛ ola se ndze yi oweka okye oshishe ba ma, ye kye-kye ikwongye ba.

¹¹ Lubana alobube tu ofe ikpewo ola kpagya ani wo, di ngwo ani.

¹² Nghawanε, ola le saan, ali ola le ayin di tishi.

¹³ Ungwɔ ntishi nɛ di yɛɛ ikwongye mbi anii? Onoka ba du! Ikyegbɛɛ nu ma difwi alobube gbɛɛ di li alobube yɔ, i kye ikwongye ba mbi ani ikpewo ungwɔ osuse, adzi ni alobube yɛɛ alobube yɛyɛ ikpewo ola mani.

¹⁴ Eyi ye ta gbɛɛ ola li ungwɔ ongwi onodzi, nghaduu ani dze mi odzɛɛdze mgbi ali ibwubwe mgbi atta, a kyen gya yi alobube dafi ofyɛɛ mani.

¹⁵ Ani yama ye ungwɔ ani le kyɔ ba. Lubana ungwɔ ngwi ani mina okyɔ ma n li kyɔn ba, kpaa ungwɔ nta ani anyi ma n li kyɔn.

¹⁶ Ni ani di kyungwɔ ngwi ani mina okyɔ ba ma kpaa, n di li gbela gbɛɛ ola tishi.

¹⁷ Ngwi i dze nghanɛ yama li ani yuen le kyɔ ba kpaa, li alobube nwodze mben mani.

¹⁸ N ye ta gbɛɛ mi atta mgbi ani ibwubwe nani, unkonyi osuse wodze mbi ani ba. Bana n sulu imina okyungwɔ osuse kpaa, n li yagba kyɔn ba.

¹⁹ Lubana ungwɔ osuse ngwi ani mina okyɔ ma n li kyɔ ba, li obube ngwi ani mina okyɔ ba ma, n li kiyayi okyɔ aali.

²⁰ Kini ani le kyungwɔ ngwi ani mina okyɔn bayɔ, yama li ani yuen le kyɔ wuba, kpaa li alobube nwodze mbi ani ma le kyɔ aali.

²¹ Nɛ n difwi gbɛɛ mfye oka le tsamu ani, onɔ ngwi i mina ani okyungwɔ osuse ma, ungwɔ obube li kye ani teyi.

²² Lubana n gbela yi ola mgbi Imgbasho itukwu onyi;

²³ nghaduu n difwi mfye oka idzidza nle gblika yi itukwu mgbi ani, i di nu ani yɛɛ ofyɛɛ alobube nkye ani le teyi mi alungwɔ ngwi ani le kyɔ duu.

²⁴ Li ali ito ishisha inggise ngwi ani dze den! Li eme ka nagbe ani mi abo atta mgbi ani nkye ani le lu ikwongye ne?

²⁵ N ta Imgbasho angba ikpewo iYesu iKrestu Otse mgbi eyi!

Nghawane, ani abuen mi itukwu mgben yo, n li ofyee mi ola mgbi Imgbasho, kpaa mi odzeedze mgbi mmbwe yi eyi yo, mfye oka le tsamu ani ni ani kyo alobube.

8

Oshishe ongwi Onodzi

¹ Nghane, onene odzili-dzili yama dze ikye ama ndze mi ifu iKrestu iYesu ba,

² ikyekye ikpewo iKrestu iYesu mfye mgbi Onodzi nu oshishe shen adi ta mi mfye mgbi alobube yi ikwongye.

³ Lubana ungwo ngwi ola yagba kyo ba, ikyegbee odzeedze mgbi inggise owamye sulu mfye mme ba ma, Imgbasho kyon. O kye ongwan deso ba mi odzeedze mgbi inggise owamye, ikye owa kyi kyelu ado okwookwo mgbi alobube mi ikpewo mgban,

⁴ adzi ni a di osaan ngwi a gbee ni eyi dze mi ola ma mbi eyi ama nle kyedo odzeedze mgbi mmbwe yi eyi ba kpaa le kyedo odzeedze mgbi Onodzi neni.

⁵ Ama ngwu mmbwe yi eyi kye ma le teyi yo, li gbe itukwu mgbi ama byi ungwo ngwi mmbwe yi eyi mina mani; kpaa ama Onodzi kye ma le teyi, li gbe itukwu ma byi ungwo ama Onodzi mina.

⁶ Itukwu mgbi inggise ngwi alobube kye le teyi yɔ li ikwongye, nghaduu itukwu ngwi Onodzi kye le teyi yɔ, li oshishe yi iyu.

⁷ Kpaa itukwu alobube, li dze mi ogbłogbło yi Imgbasho. Li yama sunu ola mgbi Imgbasho ba, hona dika yagba kpaa ba.

⁸ Ama ngwu mmbwe yi eyi kye ma le teyi yɔ, ka yagba kyungwɔ okpa Imgbasho ba.

⁹ Ema ta yɔ, mmbwe yi eyi kye ema le teyi ba kpaa li Onodzi, kini Onodzi mgbi Imgbasho wodze mbi ema yɔ. Ma ali inggise ndze yi Onodzi mgbi iKrestu ba wa, o li mgbi iKrestu luba.

¹⁰ Nghaduu ni iKrestu dze mbi abu yɔ, ewo mgbi abu kwulu ikye alobube, kpaa onodzi mgbi abu dze oshishe ikye osaan.

¹¹ Ma ni Onodzi mgbi Ongwu nkyile iYesu mi ikwu na wodze mbi abu yɔ, Ongwu nkyile iKrestu mi ikwu na dika nye mi Onodzi mgban nwodze mbi abu nɛ, dulu abu mi ikwongye luba oshishe.

¹² Nghane, emi ongwunani, eyi li ofyɛɛ mgbi imina ongwɛ ɛsɛ nɛ ba, nɛ eyi sulu itɔdze okyɛdɔ imina ongwɛ ɛsɛ wuba.

¹³ Lubana ni abu dze mgbi mmbwe yi eyi yɔ, o ka kwulu; kpaa ni abu dze mi Onodzi, kyi kyelu imina obube mgbi ewo ngwuta yɔ, o ka dze oshishe.

¹⁴ Ama ngwu Onodzi mgbi Imgbasho kye ma le teyi yɔ, a li emi ongwɛ Imgbasho.

¹⁵ Ikyesinɛ ema gbɛ onodzi nnu ema yɛɛ ofyɛɛ nka mio wuba, kpaa ema gbɛ Onodzi nnu ema yɛɛ engwɛ Imgbasho mani. Ma mi ikpewo Onodzi nɛ eyi kwun gbɛɛ, <<Baba, Otseyi.>>

¹⁶ Onodzi na abɔn kɔɔ obwende yi onodzi mgbi eyi gbɛɛ eyi li emi ongwɛ Imgbasho.

¹⁷ Ma ngwi eyi li engwɛ nɛ, eyi li ama gyokwude mgban. Eyi li ama gyokwude Imgbasho ungwonyi yi iKrestu. Eyi ka gyadze yi iKrestu, ma ni eyi gyadze yi iKrestu yɔ, eyi dika kaka okwɔkwɔ mgban yan.

Okwɔkwɔ ongwɛ iyayi

¹⁸ Ani noyɛyɛ gbɛɛ adze ngwi eyi le gye onɛnɛ nɛ yama mɛ mi okwɔkwɔ ngwi a kawa kye tso eyi ma ba.

¹⁹ Ɛsɛ duu le tsoolo ni ama wa di dafi Imgbasho ka kye emi ongwɛ tso mani.

²⁰ Lubana a nu ɛsɛ duu ndɛngyɛ, yama li itukwu ɛsɛ ba, kpaa li itukwu Imgbasho non dzɛkɛ ngha, yi ɛwɛ ogbe byi

²¹ gbɛɛ ɛsɛ abun ka wato mi adi mgbi ungwɔ ombeembe ngwi a bwan na luba ewo oshɛta okwɔkwɔ mgbi emi ongwɛ Imgbasho.

²² Lubana eyi ye dafi ɛsɛ duu le maandu dafi imba ongwɛ mani, nghataa ba onɔ dzikan neni.

²³ Yama li ɛsɛ yuon ta ba, eyi abueyi ama nka wa tu owawa ongwɛ ababɔ mgbi Onodzi ma jokpaa, le maandu mi itukwu le fɛ onɔ ngwi a ka gbɛ eyi dafi engwɛ, bɛkɛ yi ikpewo ofufɛ ngwi a zonu okye nu eyi mani.

²⁴ Ikyesinɛ li mi ɛwɛ ogbe byiibyi nɛ ngwi eyi wato aani. Kpaa ɛwɛ ogbe byiibyi ongwɛ a di yɔ, yama li ɛwɛ ogbe byiibyi luba du. Li emɛ li kye ɛwɛ byi ungwɔ ngwi ongwu teyi dzɛyan?

²⁵ Kpaa ni eyi gbɛwɛbyi ungwɔ ngwi eyi plɛ dzɛyan wa bayɔ, i ka shitukwu fɛ.

26 Mi ito ofe na kpɔɔ, Onodzi li tobyi eyi onɔ ngwi eyi dze ewo atsi mani. Eyi ye ungwo ngbuo ngwi eyi ka bibo ikyen ba, kpaa Onodzi li bo ikye eyi yi andu omaama ngwi a ka gbɔn gbe ba mani.

27 Imgbasho nli kyidi itukwu mgbi eyi ma ye oweka mgbi Onodzi, ikyekye Onodzi li bo ikye emi osaan dafi owitukwu mgbi Imgbasho dze mani.

Eyi shewo ngha ama onghaangha

28 Eyi di ye gbɛɛ alungwo nba mbi eyi duu li Imgbasho nu ofe gbɛɛ no to lo ama ongwu kpa ma itukwu ma tishi, ama ngwu a kwu ma ela mi itɔdze mgbi ongwu mani.

29 Lubana ama Imgbasho teyi ye ma ma, o kye ma dzeke dafi emi Ongwan, adzi nu ma yɛɛ yeyɛ dafi Ongwe nli Ongwovle mgbi emi ongwunɔn duu.

30 Ama ngwu o di ple kye ma dze ma, o kwu ma ela; ama ngwu o kwu ma ela ma, o di nu ma gye emyemye; ama ngwu o di nu ma gye emyemye ma, o di kye okwɔkwɔ mgban nu ma.

31 Li ali uka tsatso ngwi eyi ka nu ikye ungwo ntonɛ? Ni Imgbasho dze yi eyi ma li emeni ka fyinyenɛ yi eyi?

32 Ongwu nkye abo tukwu ongwana ba, kpaa kyon nu mi ikye eyi duu na, ka kyɔsinɛse o ka di eyi elela kye alungwo duu nu eyi ba.

33 Li emɛ ka gbe odze tukwu ama Imgbasho sadu ma nɛ ewo? Li Imgbasho li nu inggisɛ gye emyemye.

34 Li ongwu emɛ ka ngwo eyi ikwo do? Inggisɛ dzɛma ba, lubana iKrestu iYesu kwulu mi ikye eyi

a di kyilon luba oshishe ikye eyi, o di sɔdze imbe mmwɛ mi abugye mgbi Imgbasho le tɛkyɛ ikye eyi.

³⁵ Li emɛ ka gha eyi yi okpitukwu mgbi iKrestu? Li okakewo naadi adzɛ naadi iso hona enbwa hona ibiba naadi inoola naadi okwusunkli?

³⁶ Dafi Afe lo ma gbɛɛ,
<<Mi ikye abu Imgbasho,
eyi li tsigɛɛ yi ikwongye alono duu;
A di eyi dafi mmala ngwi a le
ka kye eba gbon onbukwo mani.>>

³⁷ Mi ungwɔnɛ duu kpaa eyi shewo ngha ama onghaangha ikpewo iKrestu ndi eyi kpan itukwu nani.

³⁸ Lubana n ye saan gbɛɛ ikwongye hona oshishe, naadi engyeso hona onodzi ibwubwe, hona ono ongwɔ onɛnɛ naadi ono ongwɔ iyayi, hona ali ito mfyɛ duu,

³⁹ naadi mfyɛ ongwɔ esho hona mfyɛ ongwɔ ikpɛɛ, hona ungwɔ ngwi a ta duu, ka yagba ghalu eyi yi okpitukwu mgbi Imgbasho ndzɛ mi idzidzɛ eyi yi iKrestu iYesu Otse mgbi eyi nɛ ba.

9

Imgbasho sadu emi Israi

¹ N le gbɔ otsitsi mbi iKrestu, n le mwonya ba, itukwu mgben kpaa nin obube ba, Onodzi Osaan li obwendɛ mgben,

² Eka kwowina len kpakpa itukwu di wulin jo dondu ba.

³ Bana n mina gbɛɛ ani abuen a ki wo ani ikamba di dzabo yi iKrestu mi ikye emi ongwu-nani, emi Israi ama nli eto yi ani neni.

⁴ A li emidi Imgbasho ngwu Imgbasho kyelu ma nu ma yee eto mgban. Imgbasho tso ma okwokwo mgban. O bwundu yi ama di kye ola mgban nu ma. Ozu osunu Imgbasho mi iJerosalin na beyi ondu Imgbasho dze duu li mgbi ama.

⁵ Li ama li inyabyi, di li mboma ngwi iKrestu to eto mi ese neni, ongwu nli Imgbasho onghaangha neni. Nu ma tsan gyegwu! No dze ngha.

⁶ No ka dze dafi elodzingbasho weese ba. Lubana li ama nto eto mi Israi duu li emi Israi yeye ba.

⁷ Dafi eto mgbi Abraham tsatsa li emi ongwiba mgbi Abraham ba neni. Imgbasho nya Abraham gbée, <<Li ikpewo Adziki ngwi abu ka tu eto ngwi Ani zonu yi abu nani.>>

⁸ Ungwone tso gbée, li engwe ama Abraham mba abon li emi ongwé Imgbasho kyeme-kyeme ba, kpaa li engwe ama Abraham mba mi ondu odzeedze ma ngwu a kye ma wuuta gbée engwiba mgbi Abraham aali.

⁹ Lubana li ela mgbi ondu odzeedze ma aani: <<Onova nkye ne mi ito ono ne yeye n ka yido, iSara ka byi ongwé abo.>>

¹⁰ Li nana ta ba, ongwefa mgbi iRebeka ntona a sulu otsoma onyi, otsikyeyi Adziki.

¹¹ Nghaduu, duuse ni a mba engwefa ntona, naadi nu ma wa kyo obube hona osuse yo, Imgbasho nya iRebeka gbée ongwán ongwu okwukwo na kale kyo ongwu ongbungbe ido. Imgbasho gbodze ne ikye otso gbée ongwu dulu ongwí itukwu ongwu wa, ma yama li ikye unkoka ngwi a kyo ba,

12 li mi idɔ okyɔɔkyɔ ba, kpaa li mbi Imgbasho ongwu nkwu ela mani, a nyan gbɛɛ, <<Okwukwo na kale kyɔ ongwu ongbungbɛ idɔ.>>

13 Yeye dafi Afe lɔ mani gbɛɛ, <<iJeko kpen itukwu, kpaa Isol tɛn anyi.>>

14 Nghanɛ i ka gbɔn sinɛ tso? Imgbasho kyɔ ebɛbɛ? Ngha ba dududu!

15 Lubana o gbɔ nya iMose gbɛɛ, <<Inggisɛ ngwu ani mina n ka dun elela, inggisɛ ngwu ani di mina n ka kyɔ elela won.>>

16 Nghanɛ, ungwɔ ndzɛ mbisɔ gbɛɛ ka dzɛ yɔ, li imina hona ofyaafya mgbi inggisɛ ba, kpaa li elela odiidi mgbi Imgbasho.

17 Li ngha ma ngwi Imgbasho gbɔ nya iFaro mi Afe gbɛɛ, <<Li mi itɔdzɛ nɛ yeye ngwi ani kyile abu desho, gbɛɛ nin tso mfye mgben mboo, adzi ni a gbɔdzɛn kpatɛ ɛsɛ duu.>>

18 Nghanɛ Imgbasho sulu elela odiidi mbi inggisɛ ngwu i kpan odin elela mani, o di li kye ali inggisɛ ngwu i kpan duu itukwu tiishu.

19 Inggisɛ oka mbi ema ka byi ani gbɛɛ: <<Nɛ kyɔnɛ ngwi Imgbasho di li nu eyi obube? Lubana li emɛ ka kyi ndɛlu owitukwu mgbi Imgbasho?>>

20 Ei, ka gbɔ ngha ba. Abu li emɛ, inggisɛ owamye hini, ka tangwɛ yi Imgbasho? Ungwɔ ngwi a ta-ta ka yagba nya Ongwu ntan ma gbɛɛ, <<Kyɔnɛ abu ta ani dzɛ ngha gbɛɛ?>>

21 Ongye ombɛ ishe sulu ofɛ okye akwiibɛ onyi ma mbɛ ishe ama a ka kyungwɔ ingblimɔ di mbɛ angbeka ngwi a ka kyungwɔ imɔ mi ele ba gbɛ lo?

22 Kabana Imgbasho mina otso itingga yi mfye mgban mbi ali inggisɛ ngwu o mina odzilin duu,

nghaduu o shitukwu yi ama.

²³ Kaba o kyungwone ikye otso okwokwo mgbi ongwu mi onɔ ngwi ongwu dze yi elela odiidi mbi ama ongwu kyi melu ma toke gbɛɛ ni a tu okwokwo mgbi ongwu mani.

²⁴ Eyi kpaa wodze mbi ama ngwu o sadu mani, li emi iJuda ta ba, Udzengye kpaa.

²⁵ Dafi Otse gbo yeye mi afe mgbi iHosia mani gbɛɛ:

<<A yama li <inggise mgben>

ba kpaa n ka kwu ma gbɛɛ, <Emiden>;

n ka tso okpitukwu mbi inggise
ama ngwu a

tso okpitukwu yi ama ye ba mani.

²⁶ O diye gbɛɛ,

<<Imbe ngwi a ple nya ma gbɛɛ,

<Ema li emidani ba na,>

li mi ele yeye ngwi a

dika kwu ma gbɛɛ,

<Emi ongwɛ Imgbasho oshishe.> >>

²⁷ Ongye ogbɛɛɛ Adzaya gbobakwo ikye emi Israi gbɛɛ:

<<Dafi mmbwo mgbi emi Israi dze

dafi mfyany mi onekyoo

nɛ kpaa, li gwee ni ta ka wato.

²⁸ Lubana Otse ka kwo

ɛɛ adɔ ple,

ma dika li dafi

o gbɔgbɛɛ ongwu ka kyo ma yeye.>>

²⁹ Dze yeye dafi Adzaya tsekise gbo mani gbɛɛ:

<<Ni Otse Ongha yi mfyɛ ki dzata eto mgbi eyi

angbeka oshishe bayɔ,

eyi kika dzili dafi iSodon yi iGomora mani.>>

Emi Israi noyeyε ba

³⁰ Ni i gbɔn sine tsatso? Udzengye ama ngbli mi odze osaan ba kpaa, tun mi oyeyε onuunu.

³¹ Kpaa emi Israi ama ngbli gbεε ama ki dze osaan yi Imgbasho ma kpaa tun ba.

³² Kyɔnε ngwi a tu ba? Ikyekye a pita li mi oyeyε onuunu ba, kpaa a pita dafi li mi idɔ mgbi ama okyɔɔkyɔ mani. Ali nε yεε iKrestu ngwi inggisε le tsiishi mi ele.

³³ Dafi a lɔ mani gbεε, <<Dika, n kye iKrestu la emi iDzayɔn nu ma le tsiishi beyi ikwutse nnu ma le gbεε mani, nghaduu inggisε nnun oyeyε yɔ, ka gyayiwi ba.>>

10

¹ Emi ongwunani, oweka yi ibɔ mgbi ani mbi Imgbasho ikye emi Israi yɔ, li ogbεε a ki wato.

² Lubana n ka kyɔ obwendε ikye ma gbεε Imgbasho gbε ma itukwu sɔ, kpaa a difwi ofε ngwi a ka kyεdɔ Imgbasho ba.

³ Dafi a yama ye osaan nkyε mbi Imgbasho na ba le di gbεε ama ki kyɔ osaan mgbi ikyibɔ ma nε, a gbela nu osaan mgbi Imgbasho kye ma teyi ba.

⁴ Lubana iKrestu ngyelu yi ola, ikye ni ama nnun oyeyε duu, yεε saan yi Imgbasho.

⁵ IMose nu osa mi osaan ngwi a li tu mi ola mani o gbεε, <<Inggisε nkyungwɔ ama ola gbɔ yɔ, ka dze oshishe.>>

⁶ Nghaduu osaan ndze mi oyeyε onuunu ma gbεε, <<Ka yama gbɔ mi itukwu mgbi abu gbεε, <Li emε ka kε esho?> >> (ka kye iKrestu ba esε)

⁷ <<naadi, <Li emε ka lu ese kpini?> >> (gbεε no kyile iKrestu mbi emi ikwukwɔ).

8 Imbe odze ne kyinebyi ma li ongwu aani: <<Eso mgbi Imgbasho dze kwekwe yi abu, dze ikpondu mgbi abu beyi itukwu mgbo>> ali ma, li eso mgbi oyeye onuunu ngwi eyi le gbo neni.

9 Kini abu gbo mi ondu mgbi abu gbɛɛ, <<IYesu li Otse>> di noyeye mi itukwu mgbi abu gbɛɛ Imgbasho kyilen mbi emi ikwukwo ya, o ka wato.

10 Lubana li mi oyeye onuunu mgbi ema mi itukwu ngwi ema gye emyemye, di li obwende ngwi ema kyo mi ondu mgbi ema ma, ngwi a dulu ema wato aali.

11 Dafi Afe gbo mani gbɛɛ, <<Ali inggise nnun oyeye duu, ka gyayiwi ba.>>

12 Lubana idzidza dze mbi emi iJuda yi Udzengye ba, Otse onyi ma li mgbi ama duu di li kye mse be ama nkwi mi iyi mgban duu ewo kpakpa,

13 ikyesine, <<Ali inggise nkwi mi iyi mgbi Otse duu ka wato.>>

14 Nghane, ka kyone, ngwi a ka kwu mi iyi mgbi ongwu a nun oyeye ba? Dika kyone ngwi a ka noyeye mbi ongwu a fwo odzan ba? A dika kysinese fwo ni inggise gbo nya ma ba?

15 Ni a do ma eso ba ma a ka kyone gbo? Dafi Afe gbo mani gbɛɛ, <<Ama nle wa gbo Eso Osuse ma obaaba mgbi ama sunse saan!>>

16 Kpaa li emi Israi duu gbela Eso Osuse ne ba. Lubana Adzaya gbɛɛ, <<Otse, li eme nu eso mgbi eyi oyeye?>>

17 Ongwikpa ya, oyeye onuunu kye mi ofwoofwo, ofwo eso ogbogbo mgbi elodze iKrestu.

18 Nghaduu n le byita gbɛɛ, a yama fwo ba naadi? Mi otsitsi ya a fwo, <<Ela mgbi ama gbofwe

kaka ese duu, elodze mgbi ama kpatse imbe ese dondu duu.>>

¹⁹ N dile byita gbɛɛ, Israi yama tu osa ba naadi? Ababo yɔ, iMose gbɛɛ, <<N ka nu ema di ese nli unkonyi ba ma kyofu; n ka nu ese ndifwi unkonyi ba ma kyo ema itingga.>>

²⁰ Adzaya di gbɔ yi imio ba gbɛɛ, <<Inggise ama npita ani ba ma li ama di di ani aali; N kye ewen tso mbi ama nle byita ani kpaa ba mani.>>

²¹ Nghaduu mi odze mgbi Israi yɔ Imgbasho gbɛɛ, <<I kye egbe ololo ngwi ani na abo ke mbi ama onghaado beyi ama nfwa onoyeye ntonani.>>

11

*Emi Israi ama nkale kyo oyeye
mbi Imgbasho*

¹ Nghanɛ n le byita gbɛɛ, Imgbasho fwa emidan naadi? Onoka ba du! Ani li inggise Israi abuen, ongwiba mgbi Abraham, mi agwo mgbi iBenjamin nani.

² Imgbasho yama fwa emidan ama o teyi ye ma na ba. Ema ye odze ngwi Afɛ gbɔ ikye Elaija dafi o fyewo yi Imgbasho ikye emi Israi ma lo:

³ <<Otsɛ, a kyi ngwɔlu ama ogbɛɛse mgbi abu di kyi gbobulu abu iwashi ntonani; li ani onyi ta sisi, a dile fya ongwɔ ani>>?

⁴ Ma Imgbasho nose nun uka sine? <<Ani nu inggise idubu egyafa sisi ama nfwa okwakwafɔ nu iBaa.>>

⁵ Onenɛ kpaa inggise sisi to ma ama Imgbasho sadu ma mi elela.

⁶ Ki li mi elela yɔ, yama li ido okyɔɔkyɔ wuba. Ni li otsitsi yɔ, elela ka li elela wuba.

⁷ Ungwone tso gbɛɛ osaan ngwi emi Israi le gbili mi itukwu mgbi ama onyi ma kpaa a tu ba, li ama a sadu ma gwee ma ta tu. Kpaa ama nsisi duu gbadikye,

⁸ dafi Afe lo mani gbɛɛ, <<Imgbasho nu ma itukwu yɛɛ mbuumbu, a sulu ine kpaa a li di ba, a sulu ado kpaa a li fwo ba, nghataa ba ine.>>

⁹ IDEvedi di gbɛɛ, <<Ni oga mgbi ama yɛɛ mmbwalii yi ukya, nka nu ma ese ogboogbo ngwi li ado okwookwo ngyo yi ama mani.

¹⁰ Ine no bulu lo ma mi ikye
zukwu nu ma ka yagba di ba,
ni ekpo fulu loma mi iso gyegwu.>>

Abekwo a kwokyi ma mani

¹¹ N diye byita gbɛɛ, emi Israi tsiishi gbese lamyɛ okyɛɛ-kyɛɛ? Onoka ba dududu! Ola ofaafa mgbi ama nu owato-wato ba mbi Udzengye adzi ni Israi di kyofu.

¹² Kpaa kini ado onghaangha mgbi ama yɛɛ mse mbi ese, ese ogboogbo mgbi ama di yɛɛ mse mbi Udzengye, emi iJuda duu wa gbelan ma, ito aludu ngwi inggise mi ese duu ka tu ma ka shewo sine!

¹³ N le gbodze yi ema Udzengye. Dafi ani li ongye ogbikye iYesu mbi ema Udzengye ne, n ka dze yi abo otsigegɛ mi ido mgben

¹⁴ yi ewe ogbebyi gbɛɛ kaba n ka kyile emiden itukwu esho nu ma kyofu, emi iJuda nu ma wato.

¹⁵ Lubana kini ofwaafwa ngwi emi Israi fwa Imgbasho ne yile ese duu gyiide yi Imgbasho ma, ogbela-gbela mgbi ama ka li ekye tsatso? Ka dze dafi okyile emi ikwukwo luba oshishe.

¹⁶ Kini a kye anggayi ibredi nu Imgbasho yɔ, ibredi olɔlɔ duu kpaa li mgban, ni a di gbe akpekwo nu Imgbasho yɔ, abekwo kpaa li mgban.

¹⁷ Ema Udzengye dze dafi abekwo olivi ntaagbo ngwi a kye kwokyi yi ekwo olivi ongwi inggisɛ okwo yeeye mani. Ema gbikye abɔ angbeka ngwi a fwelu ma ngwuta nani. Ma mi itɔdze nɛ, ema kpaa li tu mse ndze mbi ekwo olivi ngwi a kwokyi-kwokyi nani.

¹⁸ Nghaduu ka yama tsɛwɛ gbɛɛ abu tatase ngha abɔ ngwi a fwelu ma yangwuta na ba. Wɛ ta gbɛɛ, li abu le fyi akpekwo anya ba kpaa li akpa le fyi abu anya aali.

¹⁹ Kaba abu ka gbɔgbɛɛ, <<A kyi fwelu abɔ ntonɛ yangwuta ikye okye ani kwokyi mi ele.>>

²⁰ Li otsitsi waali. A kyi fwelu ma ikyekye a noyɛye ba, kpaa abu kwudze mi oyɛye onuunu. Ka li inggisɛ ohaha ba, kpaa dze yi imio ewo.

²¹ Dafi Imgbasho di emi iJuda ama nli abɔ mgbi atta elela ba nɛ, ema kpaa o ka di ema elela ba ngha aali.

²² Onɛnɛ ema di dafi Imgbasho nuno di leewo ma lɔ, o nuno yi ama ngbɛsɛ mani, kpaa o leewo yi ema, o dika kiyayi oleewo yi ema kini ema kiyayi yi oleewo mgban nɛ yɔ, ni li ngha bayɔ, ema kpaa a ka kyi fwelu ema ngwuta.

²³ Ni a fyumfyikye wuba ye noyɛye yɔ, a ka yile ma kwokyi, ikyesinɛ Imgbasho ka yagba yile ma kwokyi.

²⁴ Ngwi i dze ngha duu kpaa, yama li ayin ba odulu abɔ olivi ongwi ntaagbo kye wa kwokyi mi ekwo olivi osuse. Nghanɛ yama li adze ba ni

Imgbasho yile abo olivi osuse ongwí a kyí fwe ngwuta yilen kwokyi mi ita ma!

Emi Israi duu ka wato

²⁵ Emi ongwunani, i minen gbɛɛ ni ema difwi ungwo odaada neni, adzi ni ema ka kyile ewo esho ba: Emi Israi angbeka kye itukwu tiishu, a dika kɛɛkiyayi mbinose ngwi mmbwo mgbi Udzengye ka ba ngye mbi Imgbasho.

²⁶ Taman emi Israi duu ka wato, dafi a lo mi Afɛ mani gbɛɛ: <<Ongye odulu inggise wato ma ka kye iDzayon; o ka kyata emi Israi nu ma nya okwu Imgbasho shanye.

²⁷ Dika li ondu obwaabwa mgbi ani yi ama onɔ ngwi n ka kyí kyelu alobube mgbi ama mani.>>

²⁸ A kye emi Israi gbɛɛ a li engyikyili mgbi Imgbasho, ikye ni Eso Osuse kaka mbi ema Udzengye. Nghaduu a ka li ama ngwu a sadu ma, a di kpa Imgbasho itukwu ikye emi otsikyoma.

²⁹ Lubana ni Imgbasho kye umba nu inggise yo, o li ye kyí gbɛlu wuba, ama ngwu o kwu ma ela kpaa, o li ye fwa ma wuba.

³⁰ Yeye dafi ema onoka nose ngha Imgbasho ado kpaa a di ema elela ikye ado onghaangha mgbi emi Israi nani,

³¹ nghanɛ ama kpaa ye nghaado ikyegbɛɛ ni Imgbasho di ama elela mi elela odiidi ngwi o di ema nani.

³² Imgbasho gbe ali inggise duu woke obawi mi ado onghaangha mgbi ama, adzi ni ongwu wa di ma duu elela.

Tsɛ Imgbasho

33 Eɛɛn, inggise oyagba kyi mbalu aludu yi
ozoyeye mgbi Imgbasho dzema ba! Inggise
ka yagba difwi owitukwu mgban hona nu osa mi
ungwɔ ama o li kyo gbɛ ba!

34 Li emeni ye itukwu Otɛ?
Hona li emeni wan odze ye?

35 Li emɛ nu Imgbasho ungwɔ gbɛɛ no wa yilen
kpan ye?

36 Lubana alungwɔ duu tɔkyɛ mbon,
alungwɔ duu nye mbon dika ye lu mbon duu.
Okwɔkwɔ duu li mgban gyegwu! No dze ngha.

12

Ifɛ ofɛ-fɛ mgbi oshishe

¹ Ikyenghanɛ, emi ongwunani, n tɛkyɛ nu ema,
mi elela odiidi mgbi Imgbasho, gbɛɛ ni ema
kye ewo mgbi ema fife mgbi oshishe osaan nu
Imgbasho adzi ni Imgbasho dze yi atsa. Ikyesine li
ofɛ ntishi ni ema sunu Imgbasho mi onodzi aani.

² Ka kye ali mgbi ɛɛ nɛ yi ungwɔ etɔ mgbi ama
ba na, kpaa ni Imgbasho kyata ema yɛɛ inggise
ofufe mi ewodze mgbi ema otseɛtɛ. Ta ema ka
yagba ye owitukwu mgbi Imgbasho ikye ema,
ntishi di kpaan mani.

³ Lubana mi elela ngwi Imgbasho dzɛyan ikye
ani kye idɔ nɛ wo ani abɔ nɛ, n le nya ema duu
gbɛɛ, ka di ewema miine nye obyɛ ba, tatase yo yile
ewema ɛɛ mi ɛwɛ otseɛtɛ mgbi ema, mi odzɛɛdze
mgbi oyɛyɛ onuunu ngwi Imgbasho mba kye nu
ema mani.

⁴ Yeye dafi ali ogyengye mbi eyi sulu ikpewo onyi yi alewo ibyibyi neni, alewo ntone di sulu ido mgbi ama idzidza-dzidza,

⁵ nghane mbi iKrestu yo ngwi eyi li ibyibyi ne eyi yee ikpewo onyi, ma ali alewo duu li mgbi ewoma.

⁶ Eyi to yi umba idzidza-dzidza, mi odzeedze mgbi elela ngwi Imgbasho dzezan ikye eyi mani. Kini umba mgbi inggise li ido oyegbo yo, no kyo gyo-gyo dafi oyeye onuunu mgban tso mani.

⁷ Ni li okyo angbeka ido yo, no kyo ma ido, ni li otsootso yo, no tso,

⁸ ni li ofyi inggise mfye itukwu yo, no fyi ma mfye itukwu, ni li odi mi imina mgbi angbeka yo, no nu dzii, ni li ogbe inggise teyi yo, no gbe ma teyi saan, ni li odi elela yo, no kyo yi ewo osheta.

Okpitukwu

⁹ Okpitukwu no li mi otsitsi. Ungwo obube no ta abu anyi; dzle beke yi ungow osuse.

¹⁰ Di ewema kpitukwu dafi engwunewe mani. Nu angbeka mmwe ngha ewabu.

¹¹ Ka yama kyo ewewa mi ido mgbi Otse ononyi ba, kpaa zola mi Onodzi di kiyayi okyon ido.

¹² Dze yi atsa mi ewe ogbe byiibyi na, shitukwu mi adze dika nde yi ibo obobobo ba.

¹³ Ghalu ungow ngwi abu sulun yi emidi Imgbasho ama ungow kwoma oba. Kiyayi oshabota.

¹⁴ Bo Imgbasho ibo no kye mse be ama nle nu abu iso ma ewo; no ka li ikamba ba.

¹⁵ Tsatsa yi ama nle tsatsa; kye abo tiko yi ama nkye abo tiko mani.

¹⁶ Dze ondonyi yi ewema na. Ka yama kyile ewo esho ba, kpaa gye tsa yi inggise ama n yeyikpa kpaa mani. Ka di ewema miine ba.

¹⁷ Ka yama yile mkpa ungwo obube kpa inggise mi obube ba. Gbeka dze no kyungwo nli ayin mi ine ali inggise duu.

¹⁸ Fya mi ofyaafya mgbi abu no dze mi iyu yi ali inggise duu.

¹⁹ Emi okani ka yama kpa mkpa ba na, dzata abo ni Imgbasho kpumkpa na abon, lubana a lo mi Afe gbɛɛ, <<Mkpa okpaakpa li ido mgbi ani; n ka yilen kpa,>> Li ngha Otse gbo aali.

²⁰ Tatase yo, <<Ka nu enbwa do ongyikyili mgbɔɔ hona nu ekweni kwun ba, kpaa nun ungowgye no gye di nun ungwo owawa no wa. Kini abu kyo ngha yo, o gbe angola oyɔɔ tukwun ikye.>>

²¹ Ka yama nu ungwo obube ngha abu ba, kpaa ngha ungwo obube yi osuse okyɔɔkyɔ.

13

Sunu ama ogbe ɛɛ teyi

¹ Ali inggise duu no sunu ama ogbe ɛɛ teyi kyɛmɛ, lubana mfye oka dzema ba sede li onzwi Imgbasho kye dze mani. Mfye ama nto ɛɛ nɛ duu li Imgbasho ta ma.

² Ikyenghanɛ ama ntuo afo ɛɛ yi mfye nɛ duu le tuo afo ɛɛ yi ungwo ngwi Imgbasho kye dze, ama ndi kyo ngha duu a ka gbo ma ikwo.

³ Lubana ama ogbe ɛɛ teyi yama li sulu ow-itukwu obube mbi ama nle kyo ali osuse ba, sede mbi ama okyo ali ibwubwe mata. I mina abu

odze yi ewo osheta mbi inggise mfye baa? Ngyese kyungwo osuse ta o ka tse abu.

⁴ Bana o li ongbido mgbi Imgbasho ikye okyo yi abu saan. Kpaa kini abu le kyo obube yo, mio, lubana okwusunkli ngwi o kye byabo na li ayayi ba. O li ongbido mgbi Imgbasho, o li inggise nka ba yi ado okwookwo mbi ama okyo obube.

⁵ Ikyenghane, li kyeme-kyeme ni abu sunu mfye, li ikye ado okwookwo kyeme ba kpaa dafi itukwu mgbi abu tso abu mani.

⁶ Di li itodze ngwi ema li kpa udza ifyee kpaa ma aani, bana emi mfye ntone a li engbido mgbi Imgbasho, a kyi kyelu ono mgbi ama duu ogbinebyi ese.

⁷ Alungwo ngwi abu sulu inggise ele duu kye nun: kini abu kpa udza ifyee wa bayo, fya no kpa; ni li udza idu oka-ka yo, nu ma ka; ni li mmwe yo, nu mmwe; ni li oshewo yo, nu oshewo.

Tso okpitukwu, lubana Egbe ma Mba

⁸ Ka nu mkpa do abu ikye ba, sede mkpa onu ema kpa ewe itukwu ta, lubana inggise ndi odon kpan itukwu yo, o nu ola mbwumbwo.

⁹ Ola ma gbɛɛ, <<Ka gbo amah ba,>> <<Ka ngwo inggise ba,>> <<Ka yimi ba,>> <<Ka di ungwɔ engye mbe anggwɔ ba,>> ola angbeka nsisi duu a kwulu woke mbonyi gbɛɛ: <<Di inggise ama nwatse do abu kpa abu itukwu dafi ewabu mani.>>

¹⁰ Okpitukwu dze yi ungwɔ obube ikye odon ba. Nghanɛ ni abu dze yi okpitukwu yo, abu ngyelu ola duu.

¹¹ Le kyungwɔnɛni, difwi onɔ ongwɪ onɛnɛni. Onɔ gyo ngwi ema ka kyato mi una onaana, ikyekye owato-wato mgbi eyi nghao dze kwekwe onene ngha ababo nose ngwi eyi noyeye mani.

¹² Otu ne ke kpini wa; egbe dze kwekwe ofaafa. Nghane ni eyi dzata ali ama ngwi eyi li kyo ma mi iyifu ntonani di gbe okyiika mgbi osa wo ewo.

¹³ Ni i le kyungwo mi oloola, dafi ngbuo okyo mi onɔ mani, no ka li mi oga ibwubwe yi ebye ofyaafya ba, no ka li mi amah ba, kale gbɔnɔgbe hona kyofu yi ewema ba na.

¹⁴ Nghaduu, gbɛ Otse iYesu iKrestu wo ewo, dika tsewe ofe ngwi abu ka kyo imina mgbi ali ibwubwe ba.

14

Ka ngwo ewema ikwo ba

¹ Gbela yi inggise ngwu oyeye onuunu mgban fyumfye ba kpaa, kale natsondu mi ewodze mgbi ama otsɛtse ba.

² Oyeye onuunu mgbi inggise oka li non gye alungwo duu, kpaa inggise oka ngwu oyeye mgban fyumfye bayo, li gye afodɔɔ kyon.

³ Inggise nli gye alungwo duu na no ka di ongwu nli gye afodɔɔ ta na gbɛ di o li unka ba ba. Inggise ndi li sadu-sadu ungwogye na, no ka di ongwu nli gye duu na gbɛ o dze mi itɔdze ba ba, lubana Imgbasho gbela yi ama duu.

⁴ Abu li eme ogbo ongbido mgbi inggise oka ikwo? Non wende hona le kyo ayin kpaa li ongyukwo mgban ka ye. Li Otse ka non kyungwo nli ayin gbɛ, di li ongyukwo mgban ka nun emyemye aali.

⁵ Inggise oka li di gbɛɛ egbe oka le saan nga oka; inggise oka li di gbɛɛ egbe duu li ungwonyi. Ali inggise no di dafi itukwu mgban nyan mani.

⁶ Inggise nli di egbe oka gbɛɛ i nghao le saan na, le kɔɔ nga okye mmwɛ nu Otse. Inggise nli gye mmbwɛ na, le gye ikye okye mmwɛ nu Otse, lubana o li ta Imgbasho angba; inggise nfa mmbwɛ na kpaa, fwa ikye okye mmwɛ nu Otse di li ta Imgbasho angba.

⁷ Lubana eyi dɛ oshishe ikye eweyi hona kwulu ikye eweyi ba.

⁸ Kini eyi dɛ oshishe yɔ, i dɛ ikye Otse; kini eyi di kwulu kpaa, i kwulu ikye Otse. Nghane, ni eyi dɛ oshishe hona kwulu kpaa, eyi li mgbi Otse.

⁹ Li itɔdze ne yeye ngwi iKrestu kwulu diye kyɛɛ ikyegbɛɛ ni ongwu li Otse mgbi emi ikwukwɔ yi emi oshishe duu aali.

¹⁰ Ema ma, li ikye ekye ngwi ema le ngwɔ emi ongwunema ikwɔ? Hona kyɔne ngwi ema le di ongwunema gbɛɛ a li unka ba? Lubana egbe kyɛma ngwi Imgbasho ka gbɔ eyi duu ikwɔ.

¹¹ Ikyesine Otse gbɔ mi Afe gbɛɛ, <<Ani fa mi oshishe mgbi ani gbɛɛ ali akwafɔ duu ka kwɛɛ nu ani, ali idɛ dika kɔɔ obwendɛ kye otseetse nu Imgbasho!>>

¹² Inghawane, ali inggise duu ka wa gbɔ ungwɔ ngwi otsungwɔn kɔɔ nya Imgbasho.

¹³ Nghane ni eyi nya ogbɔ eweyi ikwɔ. Tatase, fya kɔɔ ali nka wo ongwunabu ekle ba mani.

¹⁴ Ngwi ani dɛ mi ifu Otse iYesu nɛ, n difwi saan gbɛɛ ungwogye onyi ka nu ani tsiidza ba. Nghaduu ni inggise di gbɛɛ ungwɔ tsiidza yɔ, i tsiidza mbon sewaali.

¹⁵ Kini ongwunabu le tu ese ogboogbo mi ungwɔ ngwi abu le gye yɔ, okyɔɔkyɔ mgbi abu tso okpitukwu wuba. Ka yama nu ongwunabu ongwu iKrestu kwulu ikyon dzili ikye ungwɔ ogyeegye mgbi abu ba.

¹⁶ Ka noofɛ ni inggise gbɔdze obube kwu iyi ungwɔ ngwi abu di gbɛɛ li osuse na ba.

¹⁷ Bana esuto mgbi Imgbasho li ungwɔ ogyeegye hona ungwɔ owaawa ba, kpaa li osaan, li iyu beyi atsa mi Onodzi Osaan.

¹⁸ Ni inggise kyɔ iKrestu idɔ mi itɔ ofɛ nɛ yɔ li kpa Imgbasho, di li kpa inggise kpaa.

¹⁹ Ni eyi fya mi ofyaafya mgbi eyi duu okyungwɔ nka ba yi iyu, di tobyi eweyi ikye ni eyi fyumfye mi oyeye onuunu mgbi eyi mani.

²⁰ Ka yama kyɔ mbelu idɔ mgbi Imgbasho ikye ungwogye ba. Ali ungwogye duu li osuse, kpaa li ayin ba ni abu gye ungwɔ nka nu inggise oka ese ogboogbo yɔ.

²¹ Tatase ogye mmbwe, naadi wa enee kwɔ hona kyɔ unkoka nka nu ongwunabu ese ogboogbo ba mani.

²² Oyeye onuunu ngwi abu tulun mi ungwɔ ntonɛ ma no li abu yi Imgbasho efa ta. Mse dze yi inggise ndze yi itukwu efefa ba mi ungwɔ ngwi o gbela okyɔ mani.

²³ Nghaduu inggise ngwu itukwu dzan efefa mi ungwɔ ngwi o le gye yɔ a ngwɔn ikwɔ, ikyekye o gye yi oyeye onuunu ba. Alungwɔ ngwi inggise kyɔ mi oyeye onuunu ba duu li alobube.

15

¹ Eyi ama oyeye onuunu mgbi eyi fyumfye nɛ,

ni eyi tobyi ama nfyumfye ba ntonani. Ni eyi kale kyungwɔ okpa eweyi kyoona ba.

² Ni eyi duu kyungwɔ nka kpa ama nwatse dɔ eyi ikye oyabɔ mgbi ama di fyu ma mfyɛ itukwu mi oyeyɛ onuunu mgbi ama.

³ Lubana iKrestu abuan kpaa kyungwɔ gbɛɛ no kpa ewon ba, dafi Afɛ gbɔ mani gbɛɛ, <<Ito ngwi a le fya abu Imgbasho ma li ani ngwu a le fya.>>

⁴ Bana alungwɔ ngwi a lɔ mi Afɛ tugbe duu li ikye otso di nu eyi itukwu ofyumfye adzi ni eyi gbekabyi.

⁵ Ni Imgbasho nli nu itukwu oshiishi di kwu inggise ɛwe wo na nu ema onodzi odɛ ondonyi ngwi ema le kyɛdɔ iKrestu iYesu nɛni,

⁶ adzi ni ema tsɛ Imgbasho Otsɔ iYesu iKrestu Otɛ mgbi eyi mi ondonyi yi itukwu onyi mani.

⁷ Gbela yi ewema na, yeyɛ dafi iKrestu gbela yi ema nɛni, ikye ni iyi Imgbasho gye oshewo.

⁸ Bana n nya ema gbɛɛ iKrestu ba dafi ongbidɔ mbi emi iJuda ikye otso gbɛɛ Imgbasho kɔ ondu ngwi o dɛ yi emi otsikyɔma mani

⁹ adzi ni Udzengye kye iyi Imgbasho desho mi elela ngwi o di ma nani, bana Afɛ lɔ gbɛɛ,

<<Ikyenghanɛ n ka tsɛ iyi abu mi idzidɛ Udzengye; N ka shashi mi iyi mgbi abu.>>

¹⁰ Afɛ di lɔ gbɛɛ, <<Ema Udzengye tsatsa yi emidi Imgbasho na.>>

¹¹ A di lɔ gbɛɛ, <<Inggise mi ɛɛ duu nu ma kyile iyi Otɛ desho di shin ashi mmwɛ.>>

¹² Adzaya di lɔ gbɛɛ, <<Mi inyabyi mgbi iJese, inggise ka wa tɔ mi ele nka li utɔ mi ɛɛ duu; Udzengye duu ka gbɛwɛbyi mbon.>>

13 Ni Imgbasho nli nu ewe ogbe byiibyi na mbwo ema yi atsa beyi iyu dafi ema nun oyeye neni, ikye ni ewe ogbe byiibyi mgbi ema mbwo mi mfyē mgbi Onodzi Osaan.

IPol inggise ogbeeso nya Udzengye

14 Emi ongwunani, ani abuen kpaa n gbela gbē ema li kyo osuse kpakpa di sulu oyeye di me otso ewema.

15 Ani lo afe nya ema mi itodze angbeka saan, n diye le we ema, ikye elela ngwi Imgbasho di ani neni.

16 O dulu ani oli inggise ogbeeso mgbi iKrestu iYesu nya Udzengye di kyido mgbi inggise ofife ogbo Eso Osuse mgbi Imgbasho, ikye ni Udzengye ye umba osuse ngwi Imgbasho gbela yan, ngwi Onodzi Osaan kyi salu ma mani.

17 Ikyenghane n dze yi abo otsigege mbi iKrestu iYesu mi ido ngwi ani le kyo Imgbasho ele neni.

18 N ka yama kyo odzasha ogbodze oka idzidza ba sede ungwō ngwi iKrestu kyo nye ikpewo ani ogbe Udzengye teyi nu ma sunu Imgbasho mi ungwō ngwi ani gbo diye kyo mani,

19 mi mfyē mgbi ambe yi ungwō ama okwulewo, mi mfyē mgbi Onodzi Osaan. Nghane wita mi iJerosalin nghataa lu Ililikun n gbo Eso Osuse mgbi iKrestu ne saan.

20 Teyi li imina mgbi ani ogbo Eso Osuse mi imbe ngwi a ye iKrestu waba, adzi nin wa le mbe dōke itozu mgbi inggise oka ba mani.

21 Nghaduu dafi a lo mi Afe mani gbē, <<Ama ngwu a teyi nya ma odze mgban waba ka wa din, beyi ama nteyi fwo waba kpaa ka tu osa.>>

²² Li itɔdze ne ngwi ani li tu onɔ oka kpadi ema ba aali.

Oweka mgbi iPol oke iRoma

²³ Nghaduu onene ngwi ani sulu imbe okyidɔ mi ayese ntonɛ wuba, ngwi i di dze ani itukwu onova ibyibi odi ema ne,

²⁴ n weka onye kpadi ema onɔ ngwi n kale ke iSpɛn mani. Tonya di kyɔ atsa yi ema ongwonɔ gwee adzi ni ema yen abɔ mi okyee mgben.

²⁵ Ngwi i dze ngha duu ne kpaa, n dze ofe le lu iJerosalin oka tobyi emi osaan.

²⁶ Lubana i kpa emi iMasidonia yi emi Acaya onu umba ikye emi osaan ndze abubɔ mi iJerosalin.

²⁷ A kyɔ yi atsa, mi otsitsi yɔ i gbuo ngwi a ki kyɔ ngha yi ama. Lubana ni Udzengye tu mse ongwɔ onodzi mbi emi iJuda yɔ, ama kpaa i gbuo nu ma kyi ghalu ungwɔ ama ngwi a sulun ma yi emi iJuda.

²⁸ Nin kye awuya ne nu ma ngye yɔ, n ka nye kpadi ema se wa lu iSpɛn.

²⁹ N ye onɔ ngwi ani ka ba mbi ema ma, n ka kye yi mse mgbi iKrestu kye.

³⁰ Emi ongwunani, n tekye nu ema mbi Otse iYesu iKrestu beyi mi okpitukwu mgbi Onodzi gbɛɛ, bɔ Imgbasho ibɔ kpɔklɔɔ mi ikye ogbili-gbili mgben neni.

³¹ Bibɔ ikye nin wato mi abɔ emi iJudia ama nnoyeye ba, ni emi osaan mi iJerosalin di gbela yi idɔ ngwi ani le kyɔ,

³² adzi ni Imgbasho nin ofe nin ba mbi ema yi atsa, adzi ni eyi kwu eweyi ewe wo.

³³ Ni Imgbasho onu iyu na dze yi ema duu. No dze ngha.

16

Angba mgbi ikyiben

¹ N tse ongwuneyi ongwu ongyaa iFoebe, nli ongyiido mi okwakye mgbi emi iKrestu mi iSenkria nani.

² N le gbɛɛ ni ema gban dafi i gbuo ogbɛ inggise nnoyeye mbi Otse di yan abo mi onɔ ngwi o mina oyabo mbi ema mani, lubana o tobyi inggise kwuba, ani abuen kpaa.

³ Ta iPrisila yi Akwila angba, ama nle kyido iKrestu iYesu yi ani ungwonyi ntonani.

⁴ A kye oshishe mgbi ama lase ikye ani kpaa. Okwakye mgbi emi iKrestu mi Udzengye duu gbede nu ma li ani yuwen ba.

⁵ Ta emi iKrestu ama nli kwakye mi ude ma na kpaa angba. Ta Epenetu okani itukwu-tukwu nli inggise ababo okyatitukwu mi ayese mgbi Asia luba iKrestu na kpaa angba.

⁶ Ta iMeri nli kwunewo ido ikye ema na angba.

⁷ Ta Androniko yi iJunaya emi oden, ama nkaka obawi yen na angba. Ama ogbikye iYesu li nu ma mmwe nngwashaba, a di teyi ani dze mi ifu iKrestu kpaa.

⁸ Ta Ampliyatu nkpa ani itukwu mbi Otse na angba.

⁹ Ta Ubanu ngwu nkwokyi abo yi eyi mi ido iKrestu na angba, di ta okani imo iStaci angba.

¹⁰ Ta Apele ongwu a mbadin di gbela yan mi ifu iKrestu na angba. Ta emidi Aristobulu angba.

11 Ta oden iHerodion angba. Ta emidi iNasiso ama nto mi ifu Otse ma angba.

12 Ta iTrafena yi iTrafosa engyaa ama nkyc Otse ido kpoklɔ na angba. Ta okani imo iPesi, ongyaa oka ndi kwunewo ido mi ifu Otse na angba.

13 Ta iRufu ngwu Otse dulun na, beyi onon n yɛɛ dafi onani kpaa na angba.

14 Ta Asinkrito, iFlegon, iHeme, iPatroba, iHema beyi emi iKrestu ama nto yi ama ma angba.

15 Ta iFyilologo yi iJulia yi iNelio beyi ongwunon onghi ongyaa, di ta Olimpa beyi emi osaan ama nto yi ama duu angba.

16 Ta ewema angba tsɛkwulu ewema na. Okwakyɛ emi iKrestu duu le ta ema angba.

17 N le tɛkyɛ nu ema emi ongwunani gbɛɛ, ni ema gbewɛbyi ama nli ba yi ogbua-gbua di li wo ema ekle yi otsootso nnye idzidza yi otsootso ngwi ema teyi kpayi nani. Fyata yi ama.

18 Lubana ito inggise ntona yama le sunu Otse iKrestu mgbi eyi ba, kpaa a le kyc ikye ifu mgbi ama. A li kpagya ogbadɔ wo yi ondu ofyumfya mgbi ama.

19 Ali inggise duu fwo dafi ema li siikyenu mani, nghanɛ n dze yi atsa kpakpa ikye ema; nghaduu i minen gbɛɛ ni ema difwi ungwɔ nli osuse, dulu abɔ mi ungwɔ obube.

20 Imgbasho iyu na ka dziyɛ iSatan dzikan-dzikan ni ema kye afɔ dzin. Ni elela mgbi Otse iYesu mgbi eyi dze yi ema.

21 ITimoti ngwu eyi le kyido yi eka, dɛsɔ angba mbi ema, li ngha ngwi iLusio yi iJason beyi iSosipata emi odo ani ntonɛ kpaa dɛsɔ angba aali.

²² Ani iTedio, nlo afe ne, le ta ema angba mbi Otse.

²³ IGayosu, inggise oshabota ngwu ani yi emi iKrestu duu tu mgbede mbon na, le ta ema angba. Erasto, nli di mi ali ido mi ogalu na yi ongwuneyi iKwatu tole ta ema angba.

²⁴ Ni elela mgbi Otse iYesu iKrestu mgbi eyi dze yi ema duu. No dze ngha.*

²⁵ Ba ni eyi kye oshewo nu Imgbasho Ongwu n yagba nu ema kwudze kpoklɔɔ mi oyeye onuunu mgbi ema, dafi Eso Osuse mgbi iYesu iKrestu lo ngwi ani gbo kwulu iba ungwɔ odaada ngwi a kye da onɔ tunto nya ema neni.

²⁶ Nghaduu onene i fwi to a di yen mi ungwɔ olɔɔɔ mgbi ama ogbeese mi ola ngwi Imgbasho ogyegwu na wo mani, adzi ni ese duu noyeye di siikye nun.

²⁷ Ni okwɔkwɔ dze mbi Imgbasho nkwiine yuon na mi ikpewo iYesu iKrestu gyegwu-gyegwu! No dze ngha.

* **16:24 16:24** Ambulu ne dze mi olɔɔɔ angbeka ba

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90